

**Kalaallit Nunaanni inissiat tapiissutitalit, taarsigassarsiartallit, attartornermut akiliutitalit aamma ikorfartukkat pillugit apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Justus Hansen, Demokraatit)

**Akissuteqaat**

(Ineqarnermut, Attaveqarnermut Angallanermullu Naalakkersuisoq)

Ineqarneq pillugu oqaaseqaatit saqqummiunneqartut pillugit Naalakkersuisut qujapput, tassani tunngavissat pingaarutillit pitsaasullu saqqummiunneqarmata.

Ineqarnermut suliasaqarfimmi ersarilluinnartoq tunngaviusumillu ajornartorsiutaasoq tassarpiaavoq, pisortat inissiaataanni attartortittakkani ineqarnermut akiliutip aamma inissiami nammineerluni pigisami najugaqarnermut akiusup assigiinngissutaat. Ajornartorsiut tamanna immikkoortillugu isummerfigineqarsimanngisaannarpoq. Assigiinngissutaasoq taanna qanoq nassuiarneqarsinnaava? Pisortat imaluunniit suliffeqarfiup namminersortup inissialiortuunera apeqqutaanngilluinnartussaagalarpoq, taamatullu inissiat inissiatut attartortittakkatut imaluunniit inissiatut nammineerluni pigisassatut atorneqartussaanerat sanaartornermut akiusumut soqutaanngilluinnartussaagalarluni.

Inissialiortiternernut kingullernut, Namminersorlutik Oqartussat 15. juli 2011-mi suliariumannittussarsiuussaannut kvadratmeterimut sanasunut aningaasartuutissat 13.082 koruuniusussaapput. Sanaartugaq naammassiguni kvadratmeterimut 17.000 koruunit inorlugit akeqartussatut naatsorsuutigineqarpoq, taakkunungalu sanaartorfissagissaanermut, atassusiinermut akitsuutinut, illussanik titartaasartunut, ingeniørinut, sanaartukkamik nakkutilliinermut, akinik iluarsiiisutinut, ukiuuneranut iliuusissanut, eqqartuussissuserisumut, kukkunerisuiisumut il.il. ilaassapput.

Sanaartukkami tassani inissiamut nammineerluni pigisamut ataatsimut, soorlu 85 m<sup>2</sup>-imut aningaasartuutissat pisortanit tapiissutitaqanngitsut qaammammut 5.700 koruunit missaanniissapput. Tassani 20%-inik aallarniuteqarnissaq aammalu 80%-inik realkreddittimit taarsigassarsinissaq naatsorsuutigineqarpoq.

Inissiaq taamaattoq pisortanit attartortinneqassappat, ineqarnermut akiliutinik naatsorsuisarneq pillugu maleruagassat maannakkut atuuttut naapertorlugit qaammammut ineqarnermut akiliutissaq 4.250 koruuninut naatsorsorneqassaaq.

Taamaattumik inissiami taamaattumi najugaqarnermi namminerisamik inissiammi najugaqarneq pisortat inissiaataanni attartortittakkami najugaqarnermut sanilliullugu akisunerugaanngimmat tamanna imminut assortuuppoq.

Tassalu inissiamut nammineerluni pigisamut tapiissuteqartoqarneq ajornera, kisiannili pisortat inissiaataannut attartortittakkanut tapiissuteqartoqartarnera ineqarnermut suliasaqarfimmi ajornartorsiuteqarnermut tunngaviunngilaq. Pisortat inissiaatanni attartortittakkani

ineqarnermut akiliummik qaffatsiartuaarnermi inissianut nammineerluni pigisanut tapiissutit peeriartuaartussaapput, taamaalillunilu tunngavissat pingaarnerit uku anguneqassallutik:

- Siullermik ineqarnermut akiliutip naammattumik qaffasitsinneqarneratigut pisortat inissiaataat pisariaqalertillugu aserfallatsaaliorneqarsinnaassapput iluarsaanneqarsinnaassallutillu, aammalu maannatut aserfallakkiartuinnassanatik.
- Aappaattut inissiani attartortittakkani inissianilu nammineerluni pigisani ineqarnermut aningaasartuutit akornanni assigiinngissutip annikillineqarnissaa angussavarput, taamaalillutalu amerlanerusut angerlarsimaffimmini namminneerlutik naalagaalernissamut kaammattussallutigit.
- Pingajuattut inissianik nammineerluni pigisanik niueruteqarnej, nammineerluni ileqqaagaqarfiusoq pitsaasumik ingerlaannarsinnaassaaq, taamaalillutillu pisortat aningaasaqarnikkut sanngiitsunik taamaallaat isumaginissinnaassallutik.
- Sisamaattut inuunermut pitsaasumut sinaakkutissat pitsaanerit anguneqassapput, pitsaasumik najugaqarfeqarnerup tamatuma angunissaanut apeqqaalluinnarnera assortorneqarsinnaanngimmat.

Taamaattumik Akileraartarnermut Atugarissaarnermullu Ataatsimiititaliap inassuteqaatai malillugit 2020-mi ineqarnermik pissusissamisoorumik ingerlatitsilernissarput, taamaalillunilu inissianik imminnut pilersorsinnaasunik tamatumunnga kajumitsitsilernissarput, aammalu pisortat aningaasaqarnikkut sanngiitsunik isumaginnilernissaat pingaaruteqarpoq. Tamanna pissutigalugu Naalakkersuisut ineqarnermi inatsisinik iluarsaasseqinnissamik, allaffissornerup annikillisinneqarnissaanik, paasiuminarnerulersitsinissamik maleruagassanillu annertuumik pisariinnerulersitsinissamik, aammalu akisussaaffiit pisortaniit inunnu nuunneqarnissaannik siunertaqarfiusumik suliaqarnialersaarput.

Ilu Moorpoq sanaartornermut inatsiserpiaq, ukioq aningaasanut inatsiseqarfiusorpiaq sinnerlugu atuuttusaaq, aammalu suliaasanut sinaakkutissanik piunasaqaatinillu nassuiaateqarfiusoq aqutsinermik pitsaanerulersitsinissaasoq aammalu suliaassat siusinnerusukkut aallartinneqarsinnaanerit periarfissiisinnaaavoq. Kisiannili Nunap Karsiani isumalluutini annikitsuinnaasuni politikikkut sukannerluinnartumik pingaarnersiuneq ingerlanneqartussaasoq piviusuuvoq. Tamanna sanaartornermut inatsisip allanngortsissinnaanngilaa.

Tassalu ukiumoorumik politikikkut aningaasanik pingaarnersiuisarneq suli pisariaqartinneqartussaavoq. Sanaartornermut inatsisip sanaartugassat suliarineqarnerini kalaallit suleqataatinneqarnissaat qulakkeerniarlugu neqerooruteqartunut piunasaqaatinik pingaarnersiukkanik aalajangersaanermut iluaqutigilluarneqarsinnaavoq, taakkunungalukalaallit suliffeqarfinit, kalaallit sulisorineqarnissaannut sulisullu ilinniartitaanissaannut piunasaqaatit ilaapput.

Kalaallit Nunaanni inatsisinik allannguisinnaanersugut, taamaalillunilu ingerlatseqatigiiffinnut inissianik tamanut iluaqutaasussanik attartortitsisussanik pilersitsinissamut ingerlatsinissamullu pilerinarsaasoqarsinnaanersooq eqqarsaatigalugu akissut naaggaavoq. Pissusiviusut tunngavigalugit inuit namminersorlutik attartortitsinermik inuussutissaqartussat siunissamut ungasissumut aningaasaliissutissanut naleqquttunik iluanaaruteqartussaapput, imaluunniit piginnittuunermi niuerfimmilu ataatsimut isigalugu annaasaqarfiusinnaasunut namminneerlutik aningaasaliissuteqartussapput, kiisalu pitsaasumik

inissianik niuerfeqarnissaq tatigisussaallugu. Taamaattumik Nuummi inissianik minnerusunik, qaammammut 14.500 koruuninik ineqarnermut akiliuteqarfiusartunik takusaqartarnerput qaqtigoortuunngilaq. Aningaasaliissutit iluanaarutaanissaat, tamatumalu peqatigisaanik aningaasaliissuteqarnermi annaasinnaasanut matussusiinissaat siunertaralugu annertussusiliisoqartarmat.

Taamatut naatsumik oqaaseqarlunga ineqarneq pillugu pilersitsiviusumik, tunngaveqarluartumik kinguneqarluartumillu, aammalu nalinginnaasumik inuiaqatigiinnut pingaartumillu innuttaasunut iluaqutaasumik nuannaarutaasumillu oqallittoqarnissaanut qilanaarpunga. Siumut isigaluta aammalu illinitoqqat kingumut qiviarnagit siunissamut pitsaasumut aqutsiniarta.